

26. august 2014

UKA 2014/94

Inatsisartut Sulieriaasianni § 33 naapertorlugu, matumuuna aalajangiiffigisassatut siunnersuut saqqummiupparput:

Inuussutissaqarnermut aqutsiveqarnerup nunatsinnut angerlaanneqarnissaa siunertaralugu Naalakkersuisut UPA2015-imi suliassamut piareersaammik saqqummiusseqqullugit kiisalu angerlaassinermi aningaasartuutissat pillugit nassuiaasioqqullugit peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortat Saxtorph Didriksen aamma Karl-Kristian Kruse, Siumut)

Tunngavilersuut:

Nunatsinni uumassusilinnik annertuunik pisuussuteqarpugut, imartatsini aalisakkat qaleruallillu amerlangaartut siumugassaapput. Taamaakkaluartoq pisuussutigut tamakkiisumik pissarsissutigisanngilagut, piareeriikkatut tunisassiaralugit nunatta iluani nunanullu allanut niuerutissatut.

Nunarsuarmioqatigiinni ineriartorneq eqqarsaatigalugu malinnaannginnitsinnut tamanna takussutissiivoq, tassa inuussutissaqarnermut aqutsiveqarnerup suli angerlaassimanginnera.

Nunatta namminiileriartornera ilutigalugu inuussutissaqarnermut aqutsiveqarneq nunatsinniit aqunneqalernissaa pissusissamisoorpoq, tamakkiissumillu akisussaaffigilernissaa pimoorullugu sulissutigisariaqarluni.

Nunatsinni aalisarneq, piniarneq, nersutaateqarneq, nunalerinerlu siuariartorfiusumik ingerlanneqassappata iliuseqartariaqarpugut. Nerisassanik pilersorneqarnerput inuiaqatigiittullu pileriaaserput kinguaariinni atorneqartoq inuuniarnitsinni tunngavingaarput. Inuussutissanik piareeriikkanik pilersorneqarnissamik siunnerfeqarnermi uatsinnut killilersortuarpugut, soorlu panertuliniarneq eqqarsaatigalugu aporfilersorneqarnikkut siuariartornissaraluarput pakkersimaarneqartoq, tamannalu aningorniartariaqalerparput. Inuussutissaqarnermut aqutsiveqarnerup angerlaannissaa piffissanngorpoq, nakkutilliinermi uagut nammineq pisariaqartitavut eqqarsaatigalugit nunatsinnut aningaasaqarnitsinnullu iluaqutaasusaaq siunertaralugu.

Qularnanngitsumik nunarsuarmioqatsitsinnut aalisakkanik, nersutinik immaqalu allaat naatitanik soorlu naatsianik avammut niueruteqalersinnaanerput periarfissarsiuukkutsigu, tamanna angusinnaavarput. Avammut niuernerup tungaatigut taamatut siursaaqutta nunatsinni innuttaasut aningaasarsiorsinnaanerat ullumikkornit periarfissagissaarnerulissapput aammalu suliffinnik ataavartunik pilersitsinissaq qularnaarneqassalluni.

EU-mut eqqussisinnaanermut tunisassiorsinnaanermullu akuersissutinik tunniussisoqarniartillugu, qallunaat nunaata inuussutissaqarnermut aqutsisoqarfianiit inuit marluk pingasulluunniit

nunatsinnut tikittarput tunisassiornermut atortunik misissuiartorlutik EU-llu piumasaqaataannik naammassinnittoqarnerisq misissoriartorlugu. Taakkua misissuiartortarnerit takutippaat nunatsinni nammineerluta nakkutilliineq nammassisinnaalluaripput.

Ukiuni kingullerni annertuumik sammineqalersimavoq imminut pilersorneq, tassalu tamanna annertunerusumik timalersorneqarnissaanut aqutissiuissaagut inuussutissaqarnermut aqutsiveqalernitsigut, kiisalu kalaallit taamaalilluta pisuussutitsinnik pileriaaserput atorlugu kalaaliminernik pilersuinissatsinnut pingaarutilimmik tunngavissaqalissaagut.

Siunnersuutip pisortanut aningaasaqarnikkut allaffissornikkullu kinguneqaatissai

Suliassamut piareersaasiorneq allaffissornikkut aningaasartuutaanissaa naatsorsuutigineqarpoq AC-tut atorfillip ukiup affaanik sulineranik (250.000 kr. miss.).

Siunnersuutip namminersorlutik inuussutissarsiortunut allaffissornikkut aningaasatigullu kinguneqaatissai

Soqanngilaq.

Siunnersuutip innuttaasunut allaffissornikkut aningaasatigullu kinguneqaatissai

Soqanngilaq.